

DOWLADDA PUNTLAND  
EE SOOMAALIYA  
XAFIISKA  
GARYAQAANKA GUUD



ولاية بونت لاند  
الصومالية  
مكتب  
المحامي العام للدولة

PUNTLAND STATE OF SOMALIA  
OFFICE OF THE SOLICITOR GENERAL

SANADKA 24<sup>AAD</sup>

CADADKA 9<sup>AAD</sup>

TAARIIKH: 10/09/24

Lam. 02

FAAFINTA RASMIGA AH  
OFFICIAL GAZETTE

الجريدة الرسمية

Sharciga Summadaha Ganacsiga Dowladda Puntland

TUSMADA	
Qeybta 1 <sup>aad</sup>	Xeerarka Baarlamaanka iyo Heshiisyada Caalamiga ah Sharciga Summadaha Ganacsiga Dowladda Puntland
Qeybta 2 <sup>aad</sup>	Xeerarka iyo Digreetooyinka Madaxweynaha. WAXBA MALEH
Qeybta 3 <sup>aad</sup>	Xeer Nidaamiyeyaasha Wasaaradaha, Xeerarka Goleyaasha Deegaanka iyo Barnaamijyada Dowladda. WAXBA MALEH
Qeybta 4 <sup>aad</sup>	Go'aanmada Maamulada iyo Qaraarada Maxkamadaha. WAXBA MALEH
Qeybta 5 <sup>aad</sup>	Amarada, Ogeysiisyada iyo Qandaraasyada Dowladda. WAXBA MALEH



DOWLADDA PUNTLAND  
EE SOOMAALIYA

XAFIISKA  
MADAXWEYNAHA



ولاية بونت لاند  
الصومالية

مكتب  
الرئيس

PUNTLAND STATE OF SOMALIA  
OFFICE OF THE PRESIDENT

Sharci Lr. 002 ee 10-ka September 2024, kuna saabsan Sharciga  
Summadaha Ganacsiga Dowladda Puntland.

**Madaxweynaha Dowladda Puntland**

**Markuu arkay:** Dastuurka Dowladda Puntland Qodobkiisa 80-aad  
farqadiisa 16-aad.

**Markuu arkay:** Ansixinta Golaha Wakiilada Dowladda Puntland ee  
Summadeedu tahay XGGW/DPL/44/2024, kuna  
taariikhaysan 12-ka Agoosto 2024.

**Markuu Tixgeliyey:** Baahida loo qabo Sharciga Summadaha Ganacsiga  
Dowladda Puntland.

**Wuxuu soo saaray**

**Sharciga soo socda:**

**Qodobka 1<sup>aad</sup>**


Golaha Wakiiladu waxay ansixiyeen Sharciga Summadaha Ganacsiga  
Dowladda Puntland.

**Qodobka 2<sup>aad</sup>**

Nuqulada asalka ah (Original) waxaa lagu kala kaydinayaa Xafiiska  
Madaxweynaha, Xafiiska Xoghayaha Guud ee Baarlamaanka iyo Xafiiska  
Garyaqaanka Guud ee Dowladda

**Qodobka 3<sup>aad</sup>**

Dhaqangalka Sharcigani wuxuu noqonayaa markuu Madaxweynuhu saxiixo  
laguna soo saaro faafinta rasmiga ah ee Dowladda Puntland

  
**Siciid Cabdullaahi Deni**  
Madaxweynaha Dawladda Puntland



DAWLADDA PUNTLAND  
EE SOOMAALIYA  
GOLAHA WAKIILLADA



ولاية بونت لاند الصومال  
مجلس النواب

Xafiiska Guddoomiyaha  
Office of the Speaker

Tix:- XGGW/DPL/44/2024 Garoowe, Isniin, Taariikh:- 12/08/2024

Ku:-Madaxweynaha DPL

Garoowe

Ujeedo:- Ansixinta Xeerka Summadaha Ganacsiga Puntland

Mudane Madaxweyne,

GUDDOOMIYAHA GOLAHA WAKIILLADU: -

MARKUU ARKAY:-

MARKUU ARKAY:-

MARKUU ARKAY:-

MARKUU TIX-GELIYEY: -

MARKUU ARKAY: -

Qodobada 60-aad (1), 64-aad (1), 68-aad(t) iyo 70-aad (1) ee Dastuurka Dawladda Puntland.

Qodobada 2-aad (1), 3-aad (1), 57-aad (2) iyo 58-aad ee Xeer-hoosaadka Golaha Wakiillada Dawladda Puntland.

Soo gudbinta Madaxweynaha Ref: MW/DPS/128/2023 ee July 22, 2023, kuna saabsan Xeerka Sumadaha Ganacsiga Puntland.

Muhiimadda ay leedahay samaynta Xeerarka Sumadaha Ganacsiga Puntland.

Dooddii iyo Go'aankii Golaha Wakiilladu kalfadhiga 54-aad fadhigiisii 11-aad ee 16.07.2024 cod gacan taag ah ku ansixiyeen Xeerka Sumadaha Ganacsiga Puntland. Guntanka Fadhiga oo ahaa (37) Mudane, waxaa ugu codeeyey oggol (31) Mudane, Diidmo majirin, halka ay ka aamuseen (6) Mudane.

WUXUU GUDDOOMIYEY: -


Ansixinta Xeerka Summadaha Ganacsiga Puntland.

Wada Shaqeyn Wacan

Md. Cabdirisaaq Axmed Siciid

Guddoomiyaha Golaha Wakiillada DPL.





**DAWLADDA PUNTLAND EE SOOMAALIYA  
GOLAHA WAKIILLADA PUNTLAND**

---

**XEERKA SUMMADAHA GANACSIGA PUNTLAND**

**Garoowe, Luulyo 2024**

Tusmada Xeerka	
QODOBBO HOR-DHAC AH .....	1
Qodobka 1-aad .....	1
Eray Bixin .....	1
Qodobka 2-aad .....	1
Magaca Xeerka .....	2
Qodobka 3-aad .....	2
Baaxadda Xeerka .....	2
Qodobka 4-aad .....	2
Ujeeddada Xeerka .....	2
Qodobka 5-aad .....	2
Mabaadi'da Xeerka .....	2
CUTUBKA 2-aad .....	3
DIIWAAN-GELINTA SUMMADAHA GANACSI .....	3
Qodobka 6-aad .....	3
Xaqa Is-diiwaan-gelinta .....	3
Qodobka 7-aad .....	3
Xafiiska Diiwaan-gelinta .....	3
Qodobka 8-aad .....	3
Shuruudaha Diiwaan-gelinta .....	3
Qodobka 9-aad .....	4
Habraaca Diiwaan-gelinta .....	4
Qodobka 10-aad .....	5
Xuquuqaha ka Dhalanaya Diiwaan-gelinta .....	5
Qodobka 11-aad .....	5
Baabi'inta Summad Ganacsi .....	5
Qodobka 12-aad .....	5
Summadaha Ganacsi ee Reebban .....	5
Qodobka 13-aad .....	6
Summadaha Ganacsi ee Horay u Jiray .....	6
Qodobka 14-aad .....	6
Summadaha Ganacsi ee Caalamiga ah .....	6
CUTUBKA 3-aad .....	6
ADEEGSIGA, WAREEJINTA IYO RAHMIDDA SUMMADAHA GANACSI .....	6
Qodobka 15-aad .....	6
Oggolaanshaha Adeegsiga Summadda Ganacsi .....	6
Qodobka 16-aad .....	7
Wareejinta iyo Rahmida Mulkiyadda Summadda .....	7
CUTUBKA 4-aad .....	7
CIQAABAHA IYO MAGDHAWGA .....	7
Qodobka 17-aad .....	7
Ciqaabaha .....	7
Qodobka 18-aad .....	8
Magdhaw .....	8



Qodobka 19-aad.....	8
Khidmadaha.....	8
CUTUBKA 5-aad .....	8
QODOBBO GUNAANAD AH .....	8
Qodobka 20-aad.....	8
Tartamada Ganacsi ee Reebban.....	8
Qodobka 21-aad.....	8
Xeer-Nidaamiye.....	8
Qodobka 22-aad .....	9
Burin .....	9
Qodobka 23-aad .....	9
Dhaqan-galka Xeerka .....	9



**CUTUBKA 1-aad**  
**QODOBBO HOR-DHAC AH**  
**Qodobka 1-aad**  
**Eray Bixin**

Xeerkan gudihiisa haddii aan si kale loo fasirin, ereyada soo socda waxaa micnahoodu noqonayaa sidan;-

No	Erayga	Macnaha
1.	<b>Xeer</b>	Waxaa loola jeedaa Xeerka Summadaha Ganacsiga ee Dawladda Puntland.
2.	<b>Wasaarad</b>	Waxaa loola jeedaa Wasaaradda Ganacsiga, Warshadaha & Maalgashiga ee Dawladda Puntland.
3.	<b>Wasiir</b>	Waxaa loola jeedaa Wasiirka Wasaaradda Ganacsiga, Warshadaha & Maalgashiga ee Dawladda Puntland.
4.	<b>Summad Ganacsi</b>	Waxaa loola jeeda wax kasta oo yeelan kara astaan gaar ah, laguna aqoonsan karo aragti, sida magacyada, ereyada, xarfaha, sawirada, astaamaha ama codadka, kuwaasoo loo adeegsanayo si loogu sooco badeeco ganacsi ama xarun bixisa adeeg.
5.	<b>Summad Caalami ah</b>	Waxaa loola jeedaa summadaha ganacsi ee aan ku koobnayn dalka laga diiwaangeliyey.
6.	<b>Maxkamad</b>	Waxaa loola jeedaa Maxkamadda awoodda sharci u leh dhegeysiga dacwadaha la xiriira summadaha ganacsiga.
7.	<b>Ajnabi</b>	Qof kasta oo caadi ah ama shakhsi Qaanuuneed ah oo aan u dhalan Jamhuuriyadda Federaalka Soomaaliya.
8.	<b>Xafiis</b>	Waxaa loola jeedaa Xafiiska diiwaan-gelinta summadaha ganacsi ee lagu asaasay Qodobka 7-aad ee Xeerkan.
9.	<b>Shahaado</b>	Waxaa loola jeedaa waraaqda caddaynaysa mulkiyadda summadda ganacsi ee la diiwaan-geliyey.
10.	<b>Diiwaan</b>	Waxaa loola jeedaa diiwaanka summadaha ganacsi ee Wasaaradda Ganacsiga, Warshadaha iyo Maalgashiga ee Dawladda Puntland.



## **Qodobka 2-aad**

### **Magaca Xeerka**

Xeerkan waxaa lagu magacaabaa Xeerka Summadaha Ganacsiga Dawladda Puntland.

## **Qodobka 3-aad**

### **Baaxadda Xeerka**

Xeerkan waxaa lagu dhaqayaa dhammaan dhaq-dhaqaaqyada ganacsi ee la xiriira summadaha ganacsi ee deegaanadda Puntland.

## **Qodobka 4-aad**

### **Ujeeddada Xeerka**

Ujeedooyinka Xeerkani waa:-

1. Ilaalinta iyo dammaanad-qaadka dhammaan summadaha ganacsi ee loo diiwaan-geliyey si waafaqsan Xeerkan.
2. Hubinta in dhammaan summadaha ganacsi loo diiwaan-geliyey si waafaqsan Xeerkan.
3. In la dhiirigaliyo hal-abuurka iyo ganacsiga ku dhisan tartanka furan ee caddaaladda ah, kuna salaysan bixinta adeegyo tayo leh.
4. In la dajiyo habraacyo iyo hagayaal lagu maamulo summadaha ganacsi ee la oggol yahay iyo kuwa ka reebban gudaha Dawladda Puntland.

## **Qodobka 5-aad**

### **Mabaadi'da Xeerka**

Xeerkani wuxuu ku dhisan yahay Mabaadi'dan soo socota:-

1. Ganacsiga xorta ah ee ku xusan Dastuurka Puntland Qodobkiisa 49-aad.
2. Ilaalinta xuquuqaha hantiyeed ee muwaadinka ee ku xusan Qodobka 17-aad, faqradiisa 1-aad ee Dastuurka Puntland iyo ka hortagga dhammaan wax walba oo wax-yeelaynaya.
3. Hubinta iyo ilaalinta tayada badeecooyinka iyo adeegyada ganacsi ee gudaha Dawladda Puntland.
4. Dhiirigelinta ganacsiga xalaasha ah ee waafaqsan Axkaamta Shareecada, mucaamalaadka Islaamiga ah iyo Dastuurka Puntland.
5. Bixinta magdhaw u dhigma dhibaatooyinka la soo gaarsiiyey ganacsiga lagu been abuurto summaddooda.





**CUTUBKA 2-aad**  
**DIIWAAN-GELINTA SUMMADAHHA GANACSI**

**Qodobka 6-aad**

**Xaqa Is-diiwaan-gelinta**

Xaqa is-diiwaan-gelinta waxaa yeelanaya cid kasta oo ka mid ah dhinacyadan hoos ku xusan:-

1. Qof kasta oo ah muwaadin Soomaaliyeed ama ajnabi oo leh shakhsiyad dabiici ah ama mid qaanuuneed oo ka ganacsada badeecooyin ama adeeg bixin.
2. Qof kasta oo kamid ah dadka ku xusan isla qodobkan, faqradiisa 1-aad, kuwaasoo doonaya inay adeegsadaan summad ganacsi oo u gaar yeelaya badeecadooda, wax soo saarkooda ama adeegga ay bixinayaan waa inuu diiwaangashadaa summaddiisa ganacsi si waafaqsan xeerkan.

**Qodobka 7-aad**

**Xafiiska Diiwaan-gelinta**

1. Wasaaraddu waxay samaynaysaa Xafiiska Diiwaan-gelinta Summadaha Ganacsiga ee Dawladda Puntland.
2. Xafiisku wuxuu diiwaan-gelinayaa summadaha ganacsi ee ay leeyihiin ganacsiyada ka hawl-gala deegaannada Puntland.
3. Xafiisku wuxuu yeelanayaa diiwaanka summadaha ganacsi, kaasoo lagu diiwaan-gelinayo dhammaan noocyada kala duwan ee summadaha ganacsi, magacyada mulkiilayaasha, noocyada badeeco, adeeg ay qabato ama bixiso iyo dhammaan xogaha muhiimka ah ee la xiriira diiwaan-gelinta summadaha ganacsi.
4. Xafiisku wuxuu Diiwaan-gelin karaa oo keliya codsadaha buuxiyey shuruudaha ku xusan Qodobka 8-aad ee Xeerkan.
5. Qaab-dhismeedka Xafiiska waxaa qaabayn doona Wasaaradda.
6. Nooca Khidmadda diiwaan-gelinta summadaha ganacsiga waxaa jaangoynaya xafiiska diiwaan-gelinta summadaha ganacsiga, waxaana oggolaanaya Wasiirka, iyadoo la raacayo shaxda khidmadaha ee Xeerkan.

**Qodobka 8-aad**

**Shuruudaha Diiwaan-gelinta**

Xafiiska diiwaan-gelinta ee Wasaaraddu wuxuu diiwaan-gelin karaa oo kaliya marka uu codsaduhu soo buuxiyey shuruudaha soo socda:-

- b. Waa inuu codsaduhu soo gudbistaa arji qoraal ah.
- t. Waa in summadda codsaduhu rabo in loo diiwaan-geliyo aanay kamid ahayn summadaha ganacsi ee lagu mamnuucay Qodobka 12-aad ee xeerkan.
- j. Waa inuu bixiyaa khidmadda diiwaan-gelinta summadda.



- x. Waa inuu la yimaado aqoonsi dawladi bixisay.
- kh. Waa inuu leeyahay shati ganacsi.
- d. Waa inuu soo gudbiyo xeerka lagu asaasay shirkadda.
- r. Wakaalad haddii mulkiiluhu maqan yahay ama summad Shirkad shisheeye ah la diiwaangelinayo.
- s. Summadda ganacsi ee dalkiisa haddii Shirkaddu shisheeye tahay.

## **Qodobka 9-aad**

### **Habraaca Diiwaan-gelinta**

1. Xafiiska diiwaan-gelinta ee Wasaaraddu markuu xaqiijiyo in codsaduhu soo buuxiyo dhammaan shuruudaha diiwaan-gelinta ku xusan Qodobka 8-aad ee Xeerkan, wuxuu summadda ganacsi ku shaacinayaa warbaahinta madaxa bannaan iyo kuwa Dawladda.
2. Qof kasta oo cabasho ka qaba mulkiyadda summadda la shaaciyey, wuxuu muddo 45 casho gudahood ah ugu soo gudbinayaa cabashadiisa xafiiska diiwaan-gelinta summadaha ganacsiga ee Wasaaradda.
3. Marka ay dhammaato muddada shaacinta summadda ee ku xusan Qodobkan farqadiisa 2-aad, haddii la waayo wax cabasho ah ama cid sheegata mulkiyadda summadda ganacsi ee la shaaciyey wuxuu xafiisku codsadaha u diiwaan-gelinayaa summadda ganacsi, waxaana lagu qorayaa diiwaanka summadaha ganacsiga, waxaana la siinayaa shahaadada diiwaan-gelinta oo caddeynaysa mulkiyadda summaddaas, saxiixa ugu dambeeya ee shahaadada diiwaan-gelinta waxaa yeelanaya Wasiirka Wasaaradda.
4. Shahaadada diiwaan-gelinta ee lagu bixiyey si waafaqsan Qodobkan farqadiisa 3-aad waa inay ka muuqdan xogaha soo socda:-
  - b. Tix-raaca diiwaan-gelinta summada ganacsi.
  - t. Taariikhda la diiwaan-geliyey summadda.
  - j. Magaca summadda ganacsi ama magaca qofka iska leh summadda iyo meesha uu ku nool yahay.
  - x. Sawirka summadda la diiwaan-geliyey.
  - kh. Xogta badeecadda, wax soo saarka ama adeegga ee summadda lagu diiwaan-geliyey.
  - d. Lambarka iyo taariikhda soo kala horreynta dawliga ah si waafaqsan heshiiska caalamiga ah ee ilaalinta mulkiyadda warshadaynta.
5. Waxaa reebban in loo adeegsado summadda ganacsi ujeeddo baal-marsan middii loo diiwaan-geliyey si waafaqsan Qodobkan faqradiisa 4-aad xarafka (kh).
6. Xafiiska diiwaan-gelintu wuxuu diidi karaa codsiga diiwaan-gelinta summad kasta oo diiwaan-gelin loo rabo haddii uu xaqiiqsado inaysan summadu buuxin shuruudaha diiwaan-gelinta summadaha ganacsiga ee ku xusan Qodobka 8-aad ee xeerkan.



7. Codsadaha loo diido diiwaan-gelinta summadda ganacsi si waafaqsan qodobkan, wuxuu cabasho u gudbisan karaa Agaasimaha Guud, haddii uu ku qanci waayona go'aankiisa, wuxuu cabashadiisa u gudbin karaa Wasiirka Wasaaradda oo leh maamul ahaan go'aanka kama dambaysta ah, haddii Wasiirku aqbali waayo cabashadiisa wuxuu u dacwoon karaa Maxkamadda awoodda u leh.

### **Qodobka 10-aad**

#### **Xuquuqaha ka Dhalanaya Diiwaan-gelinta**

Diiwaan-gelinta summadda ganacsi waxaa ka dhalanaya xuquuqahan soo socda:-

- b. Ilaalinta summadda ganacsi muddo dhan toban (10) sano, kana bilaabmaysa maalinta la diiwaangeliyey summadda.
- t. Xaqa adeegsiga summadda ee mulkiilaha, iyadoo looga ilaalinayo dadka kale, inay adeegsadaan summaddiisa xaaladaha ay dhici karto in lagu khiyaamo dadweynaha badeecadda ama adeegga summaddan loo diiwaan-galiyey.

### **Qodobka 11-aad**


#### **Baabi'inta Summad Ganacsi**

1. Mulkiilaha summad ganacsi wuxuu codsan karaa baabi'inta summad ganacsi, taasoo ku diiwaangashan magaciisa.
2. Xafiiska diiwaan-gelinta summaddaha ganacsiga ama cid kastoo awood sharci u leh waxay baabi'in karaan summad kasta oo ganacsi hadday caddaato in diiwaan-gelinta summadda ganacsi lagu helay sifo baal marsan xeerkan.
3. Xafiiska diiwaan-gelinta summaddaha ganacsiga iyo cid kastoo awood sharci u leh waxay dalban karaan baabi'inta summad ganacsi haddii mulkiilaha summadda ganacsi aanu adeegsan summadda muddo shan (5) sano oo xiriir ah.

### **Qodobka 12-aad**

#### **Summadaha Ganacsi ee Reebsan**

1. Astaamahan soo socda looma diiwaan-gelin karo summad ganacsi ahaan:-
  - b. Summadda oo aan lahayn astaan gaar ah oo ka soocaysa summaddaha kale.
  - t. Summadda oo ay ka muuqato anshax xumo ama wax ka hor-imanaya Diinta Islaamka iyo nidaamka Dawliga ah.
  - j. Astaanta oo leh ama shabahaysa astaan Diineed.
  - x. Summadaha u eg astaan qaran ee dalka sida calanka, astaamaha dawladda kale urur goboleedyada, ururrada dawliga ah iyo kuwa Caalamiga ah.
  - kh. Magacyada dadka kale ama sawiradooda iyadoo oggolaansho laga haysan.
  - d. Astaan laga soo tarjumay summad ganacsi oo la yaqaan.
  - r. Summadaha ay leeyihiin dadka ay mamnuuca tahay ina lala shaqeeyo.
  - s. Astaamaha adeegsigooda awgood noqday kuwa caan ka ah bulshada dhexdeeda.
  - sh. Astaan walba oo ku salaysan nacayb, ka turjumaysa faquuq ama hayb-sooc, dhalin



karta xasarad ama kicin dadweyne.  
dh. Astaan walba oo ka hor-imanaysa dhaqanka, aragtida iyo siyaasadda ganacsi ee Dawladda Puntland.

### **Qodobka 13-aad**

#### **Summadaha Ganacsi ee Horay u Jiray**

1. Si loogu ilaaliyo summadahooda ganacsi, mulkiilayaasha summadaha ganacsi ee horey u jiray waa inay u diiwaangeliyaan summadahooda ganacsi si waafaqsan ee Xeerkan.
2. Khilaafaadka iyo murannada la xiriira lahaanshaha summadaha ganacsi ee jiray dhaqangalka Xeerkan ka hor waxaa xallinaya Xafiiska Diiwaan-gelinta Summadaha Ganacsi ee lagu asaasay Qodobka 7-aad ee Xeerkan, isagoo mudnaanta siinaya sida loogu soo kala horreeyey summadda la isku haysto.
3. Khilaafaadka iyo murannada la xiriira lahaanshaha summadaha ganacsi ee dhashay dhaqan galkan Xeerkan, kadib waxaa lagu dhaqayaa Qodobada Xeerkan.

### **Qodobka 14-aad**

#### **Summadaha Ganacsi ee Caalamiga ah**

Ma bannaana diiwaan-gelinta summadda ganacsi oo caalamiga ah, taasoo aan oggolaansho ka haysan asalka cidii iska lahayd summaddaas.

### **CUTUBKA 3-aad**

#### **ADEEGSIGA, WAREEJINTA IYO RAHMIDDA SUMMADAHA GANACSI**

### **Qodobka 15-aad**

#### **Oggolaanshaha Adeegsiga Summadda Ganacsi**

1. Mulkiilaha summadda ganacsi wuxuu gabi ahaan ama qayb ahaan oggolaansho u siin karaa adeegsiga badeecadda ama adeegga ku diiwaan-gashan summaddiisa ganacsi.
2. Heshiiska oggolaanshaha adeegsiga summadda ganacsi waa inuu noqdaa mid qoran, waana inaanu ka badan muddada xeerkani ilaalinayo summaddan.
3. Heshiiska oggolaanshaha summadda ganacsi waa inuu ka koobnaadaa arrimahan soo socda: -
  - b. Deegaanka ama dalka badeecada ama adeegga loo suuq-geynayo.
  - t. Muddada oggolaanshaha adeegsiga summadda ganacsi.
  - j. Baaxadda adeegsiga summadda iyo waxyaabaha la isla oggolaaday in loo adeegsado.
  - x. Habraaca qaybsiga ama wadaagga faa'iidada ama khasaaraha ka dhasha adeegsiga summadda ganacsiga.
  - kh. Ka fogaanta wax walba oo hoos u dhigi kara badeecadda ama adeegga.



- r. Ilaalinta tayada badeecada ama adeegga.
- s. Wax walba oo sumcad darro u keeni kara summadda ganacsi.

### **Qodobka 16-aad**

#### **Wareejinta iyo Rahmida Mulkiyadda Summadda**

1. Waxaa bannaan wareejinta mulkiyadda summadda ganacsi ee la diiwaangeliyey, wareejintu waa inay ku dhacdaa si waafaqsan heshiiska labada dhinac, Qodobada wareejinta iyo rahanta ee ku xusan Xeerka Madaniga Soomaaliyeed.
2. Wareejinta mulkiyadda iyo rahmida summadda ganacsi waa inay noqotaa mid qoran waxaana hagaya Xeerka Madaniga Soomaaliyeed.

### **CUTUBKA 4-aad**

#### **CIQAABAHA IYO MAGDHAWGA**

### **Qodobka 17-aad**

#### **Ciqaabaha**

1. Iyadoo aan wax loo dhimayn ciqaabaha ku qoran Xeerka Ciqaabta Soomaaliyeed, waxaa lagu ciqaabayaa hal (1) sano oo xabsi ah iyo ganaax lacageed oo aan ka badnayn laba kun oo doolar (\$2000) ama Sh.So u dhigma Qof kasta oo :-
  - b. Ka been abuurta summad ganacsi oo diiwaangashan laguna ilaaliyey si waafaqsan Xeerkan.
  - t. Soo bandhiga adeegyo wata summad ganacsi kuwaas oo laga been abuurtay.
  - j. Iibiya ama iib u soo bandhiga badeeco wadata summad ganacsi oo laga been abuurtay.
  - x. U isticmaala summadda ganacsi ujeedo baalmarsan middii loo diiwaan-geliyey.
2. Haddii ay soo laabtaan xadgudubyada ku xusan isla Qodobkan faqradiisa 1-aad ciqaabaha waa la siyaadin karaa hadba sida garsooruhu uu u arko, waxaana la xiri karaa xarunta samaysay xadgudubka muddo aan ka badnayn shan (5) bilood.
3. Maxkamaddu waxay wax ku xukumi kartaa ciqaabo dheeri ah oo ku xiran hadba waynaanta xadgudubka, waxaana kamid ah ciqaabahaas: -
  - b. La wareegidda badeecadda la qabtay ee wadata summadda ganacsi ee laga been abuurtay.
  - t. Baabi'inta summadda ganacsi ee been abuurka ah.
  - j. La wareegidda qalabka loo adeegsaday been abuurka summadda ganacsi ee Xeerkan ilaaliyey.
  - x. In gabi ahaanba la joojiyo dhoofinta iyo soo dajinta badeecadda wadata summadda ganacsi iyo magaca laga been abuurtay.
  - kh. In xukunka lagu faafiyo warbaahin rasmi ah, kharashka faafinta xukunkana laga qaado dambiilaha.



## **Qodobka 18-aad**

### **Magdhaw**

Qof kasta oo ay dhibaato ka soo gaarto fal-dambiyeedyada ku xusan Qodobka 17-aad, faqradiisa 1-aad ee xeerkan, wuxuu xaq u leeyahay inuu dacweeyo eedaysanaha si uu magdhow u helo.

## **Qodobka 19-aad**

### **Khidmadaha**

1. Khidmadaha diiwaan-gelinta summadaha ganaciga waxaa loo raacayaa sida ku cad Lifaaqa Xeerkan.
2. Khidmadaha laga qaado summadaha ganacsiga waxay ka mid noqonayaan dakhliga guud ee Dawladda.

## **CUTUBKA 5-aad**

### **QODOBBO GUNAANAD AH**

#### **Qodobka 20-aad**

#### **Tartamada Ganacsi ee Reebban**

Waxaa reebban tartan ganacsiyeed kasta oo ka hor-imanaya tilmaamaha Xeerkan, waxaana kamid ah: -

- b. Magac dilka qofka, badeecada ama adeegga summadda ganacsi ee cidda tartanka ganacsi ka dhaxeeyo.
- t. Xayaysiisyada marin habaabinta ah ee ka fog runta.
- j. Xadista siraha ganacsi.

#### **Qodobka 21-aad**

#### **Xeer-Nidaamiye**

Wasaaradu waxay awood u leedahay in ay soo saarto xeer-nidaamiye, wareegtooyin, hageyaal iyo tilmaamo lagu fulinayo qodobada Xeerkan oo aan ka hor-imaanayn Xeerkan.



## **Qodobka 22-aad**

### **Burin**

1. Xeerkan wuxuu burinayaa xeer kasta oo la xiriiray summadaha ganacsi oo aan la socon karin kana hor-imanaya Qodobada ku xusan Xeerkan.
2. Waxaa la buriyey Qodobka 30-aad iyo Qodobka 34-aad farqadiisa 7-aad, ee Xeerka Shatiyada Ganacsiga Puntland oo sheegaya warqadaha diiwaan-gelinta summadaha ganacsiga iyo khidmada laga qaadayo.
3. Qodobada ku xusan Xeerka Ciqaabta Soomaaliyeed, habka ciqaabta, Xeerka madaniga iyo habka Madaniga iyo dhammaan xeerarka kale ee xiriirka la leh, kuwaasoo aan ka hor-imanayn Qodobada xeerkan waa la dabaqayaa marka la fulinayo xeerkan.

## **Qodobka 23-aad**

### **Dhaqan-galka Xeerka**

Xeerkani wuxuu dhaqan galayaa marka Golaha Wakiilladu Ansixiyo, Madaxweynaha Dawladda Puntland saxiixo, laguna soo saaro faafinta rasmiga ah ee Dawladda Puntland.





**DAWLADDA PUNTLAND EE SOOMAALIYA**  
**GOLAHA WAKIILLADA PUNTLAND**

---

**SHAXDA TARIIFOOYINKA**  
**SUMMADAHA GANACSIGA**

---

**Garoowe, Luulyo 2024**





## Tariifooyinka Summadaha Ganacsiga

1. Qiimaha foomka diiwaan-gelinta summadaha Ganacsigu waa boqol doolar (\$100) ama Sh.So u dhigma.
2. Shirkadii hal summad leh oo ganacsiyo kala duwan u adeegsata waxay bixinaysaa kun doolar (\$1000) ama Sh.So u dhigma.
3. Qofkii doonaya in uu u qaato summad ganacsi hal shirkad wuxuu iska bixinayaa qiimaha loo jaan gooyey, shirkadii doonaysa in loo ilaaliyo labo summad Ganacsi iyo wixii ka badan waxay iska bixinaysaa summad walba qiimaheeda.
4. Shirkadii doonaysa in loo diiwaan-geliyo summad shirkad caalami ah oo ay wakiil Puntland uga tahay oggolaanshana ka haysata in ay isticmaasho calaamada shirkada caalamiga ah waxay bixinaysaa labo kun doolar (\$ 2000) ama Sh.So u dhigma.
5. Xifdinta Summadda si ku meel gaar ah saddex bilood waa boqol doolar (\$100) ama Sh.So u dhigma.

### 1. KHIDMADDA SUMMADDA WARSHADAAHA

No	Nooca Warshadaha	Diiwaangalinta Summadda Ganacsiga
1	W- Yaryar (1-50 shaqaale)	\$ 500
2	W-Dhex-dhexaad (50-99 Shaqaale)	\$ 700
3	W-Waaweyn (100 shaqaale wixii ka badan)	\$ 900

### 2. KHIDMADDA SUMMADDA SOO DAJINTA

NO	NOOCA SHIRKADDA	Khidmadda 10 sano
1	Raashinka, Cunooyinka iyo Bagaashka	\$ 500
2	Maacuunka iyo Boorsooyinka	\$ 300
3	Agabka Beeraha iyo Abuurka Beeraha	\$ 500
4	Carwooyinka Dharka iyo Kabaha	\$ 300
5	Huudheyda iyo dharka	\$ 200
6	Dawooyinka iyo Qalabka Caafimaadka	\$ 600
7	Cabitaannada iyo cuntooyinka Qasacadeysan	\$ 300
8	Gaadiidka iyo Qalabka dayactirka gaadiidka	\$ 600
9	Qalabka Xafiisyada (Stationary)	\$ 500
10	Qalabka Dhismaha iyo Guryaha	\$ 600
11	Qaadka	\$ 1000
12	Alaabaha udugga	\$ 300
13	Dahabka, dheemanka iyo waxyaabaha laysku qurxiyo	\$ 500
14	Shidaalka iyo Gaaska	\$ 600
15	Qalabka Electronics-sida Mobilada, TVs Computers etc	\$ 500



16	Qalabka Matorada, Korantada ( Electronic) iyo Qalabka Cadceedda ku shaqeyaa (Solar System)	\$ 600
----	--	--------

### 3. KHIDMADDA SUMMADDA DHOOFINTA

NO	NOOCA SHIRKADDA	Khidmadda 10 sano
1	Shirkadaha Kalluunka dhoofiya	\$ 400
2	Shirkadaha Haraga dhoofiya	\$ 300
3	Shirkadaha xoolaha dhoofiya	\$ 600
4	Shirkadaha xabkaha ,Beeyada iyo faleenka dhoofiya	\$ 500
5	Shirkadaha Biraha Duuga ah dhoofiya	\$ 700
6	Shirkadaha Cusbada dhoofiya	\$ 300
7	Shirkadaha Qalabka Hiddaha iyo dhaqanka dhoofiya	\$ 200
8	Shirkadaha Qudaarta Dhoofiya	\$ 300
9	Shirkadaha Macdanta iyo dhagxaanta Dhoofiya	\$ 600

### 4. KHIDMADDA SUMMADDA ADEEG-BIXIYAASHA

NO	NOOCA SHIRKADDA	Khidmadda 10 sano
1	Shirkadaha daabulka iyo soodejinta( Clearance & Handling)	\$ 500
2	Cisbitaallada	\$ 600
3	Jaamacadaha iyo Macaahidda	\$ 500
4	Shirkadaha Korantada	\$ 1000
5	Shirkadaha Biyaha	\$ 1000
6	Shirkadaha Isgaarsiinta	\$ 1000
7	Shirkahada Xawaaladaha	\$ 1000
8	Bangiyada	\$ 1000
9	Adeegga Safarrada iyo Xajka	\$ 500
10	Shirkadaha safarrada Socdaalka Gudaha	\$ 500
11	Shirkadaha IT iyo Internet-ka	\$ 1000
12	Shirkadaha Caymiska	\$ 1000
13	Shirkadaha Daabacaada	\$ 500
14	Shirkadaha Dhismaha	\$ 500
15	Shirkadaha Kalluumaysiga	\$ 500
16	Hotel 1	\$ 500
17	Hotel 2	\$ 1000
18	Dugsiyada Waxbarashada	\$ 500
19	Dalladaha Waxbarashada	\$ 300
20	Warbaahinta (Radio TV Wabsiyada, Wargeysyada IWM)	\$ 400
21	Wakiillada Maraakiibta	\$ 400
22	Shirkadaha Diyaaradaha	\$ 1000
23	Shirkadaha Latalinta	\$ 600
24	Hay'addaha Cilmi Baarista	\$ 600



<b>25</b>	Nootaayooyinka	
<b>26</b>	Shirkadaha Baarista iyo godista shidaalka & Macdanta	\$ 300
<b>27</b>	Shirkadaha adeegga ilaalada bixiya (Security Service Company)	\$1000
<b>28</b>	Shirkadaha guryaha Kireeya ama iibiya (Real estate Services Companies)	\$ 1000
<b>29</b>	Shirkadaha Saadka (Supply and Logistics Services)	\$ 500
<b>30</b>	Shirkadaha Gaadiidka (Supply and Logistics Services)	\$ 300
<b>31</b>	Shirkadaha Qandaraasyada	\$ 600
<b>32</b>	Shirkadaha Qodista Ceelasha iyo Waraha	\$ 500
<b>33</b>	Maamulka iyo Maareynta	\$ 400
<b>34</b>	Soo dejinta Mootooyinka, Bajajaata iyo dayactirkooda	\$ 300
<b>35</b>	Shirkadaha Maamulka Maaliyadda iyo Ganacsiga	\$ 500
<b>36</b>	Shirkadaha Technogyada iyo ICT-ga	\$ 500
<b>37</b>	Shirkadaha Adeegga Dhismaha	\$ 500

